

आकाशवाणी

खबरां विजय बजाज कोला

1. प्रधानमंत्री नरेन्द्र मोदी होंरें भारत दे कृशि उत्पादें गी आलमी सतह उप्पर मुकाबलेबाजी आहला बनाने लेई उच्चे मुल्ल आहली फसलें दे उत्पादन गी बधाने पर चेचा जोर दिता।
2. गृह मंत्री अमित शाह होंरें कल ओडिशा च 3 जहार 770 करोड़ रुपें शा मते दिएं केई विकास परियोजनाएं दा उद्घाटन कीता ते केइएं दे नीह पत्थर रक्खे न।
3. शैही हवाबाजी सरबंधी महानिदेशालय-डी.जी.सी.ए. ने उत्तर प्रदेश दे गौतम बुद्ध नगर जिले दे जेवर च स्थित नोएडा अंतरराष्ट्री ब्हाई अड्डे लेई यमुना इंटरनेशनल एयरपोर्ट प्राइवेट लिमिटेड गी ब्हाई अड्डा लसैंस प्रदान कीता ऐ।
4. नेपाल च नमी सरकार दे गठन लेई होए दे आम चुनावें तैहत वोटें दी गिनतरी चला करदी ऐ।

5. पच्छिम एशिया च जारी फौजी संघर्ष दा अज्ज 8मां दिन ऐ। अमरीकी राष्ट्रपति डॉनल्ड ट्रम्प होरें आखेआ ऐ जे ईरान कन्नै कोई समझौता नेई होग ते उसी बिजन कुसै शर्त दे सरेंडर करना होग।

<><><><><><><>

### PM-Natural Farming

प्रधानमंत्री नरेन्द्र मोदी होरें उत्पादकता ते निर्यात सरबंधी समर्थ बधाने आस्तै भारत दी बन्न-सबन्नी जलवायु परिस्थितियें दा पूरा-पूरा इस्तेमाल करने दी जरूरतें पर जोर दिता ऐ। प्रधानमंत्री होरें कल वीडियो कॉन्फ्रेंसिंग दे राहें 'कृषि ते ग्रामीण परिवर्तन' कन्नै सरबंधत वेबिनार गी संबोधित करदे होई देशें दे कृषि उत्पादें गी आलमी सतह उप्पर मुकाबलेबाजी आहला बनाने लेई उच्चे मुल्ल आहली फसलें दे उत्पादन गी बधाने पर बी चेचा जोर दिता। उ'नें आलमी सतह उप्पर मंग च होआ करदे बदलाव ते भारती कृषि खेतर गी निर्यात प्रमुख बनाने दी जरूरतें दा बी जिक्र कीता। श्री मोदी होरें आलमी सतह उप्पर गुणवत्ता ते ब्रांडिंग मानकें गी पूरा करने लेई माहिरें-विशेषज्ञें, उद्योगें ते करसानें गी शामिल करदे होई संगठित नजरिया अपनाने दा आहवान कीता ते मुकामी करसानें गी आलमी सतह दे बजारें कन्नै जोड़ने लेई स्पष्ट लक्ष्य निर्धारित करने दे महत्वें पर बल दिता। उ'नें आखेआ जे इस ब'रे दे केंद्री बजट च काजू, कोको ते चंदन सने उच्चे मुल्ल आहली कृषि बक्खी बी ध्यान केंद्रित कीता गेआ ऐ। प्रधानमंत्री होरें आखेआ जे अज्ज दुनिया सेहत दे प्रति मती जागरूक

होआ करदी ऐ, जेहदे च पूरी-पराती सेहत दिक्खभाल ते जैविक खान-पान बक्खी चेचा ध्यान दिता जा करदा ऐ। प्रधानमंत्री मोदी होरें आखेआ जे सरकार कृषि च तकनीकें बक्खी बी बड़ा मता ध्यान देआ करदी ऐ। उ'नें आखेआ जे अज्ज ई-नाम दे माध्यम कन्ने बजार धोहड़ी सबनें दी पुज्जी होई गेदी ऐ। श्री मोदी होरें आखेआ जे प्रधानमंत्री आवास योजना, स्वामित्व योजना, पीएम ग्रामीण सड़क योजना ते आप सहायता समूहें गी माली मदाद ज्नेह जतनें कन्ने ग्रामीण अर्थबवस्था मजबूत होई ऐ। उ'नें आखेआ जे सरकार ने 3 करोड़ लखपति दीदी तैयार करने दा लक्ष्य कामयाबी कन्ने हासल करी लैता ऐ ते 2029 तगर 3 करोड़ होर लखपति दीदी तैयार करने दा लक्ष्य रक्खेआ गेआ ऐ।

<><><><><><>

Amit Shah Odisha

गृह मंत्री अमित शाह होरें कल ओडिशा च 3 जहार 770 करोड़ रुपें शा मते दिएं केई विकास परियोजनाएं दा उद्घाटन कीता ते केइएं दे नीह पत्थर रक्खे न। इंदे च दुधै दे विकास सरबंधी राश्ट्री बोर्ड, ओडिशा राज्य सहकारी दुध उत्पादक संघ दी विकास पैहल ते राज्य सरकार दिआं बक्ख-बक्ख परियोजनां शामिल न। श्री शाह होरें इंडियन फार्मर्स फर्टिलाइजर कोऑपरेटिव लिमिटेड दी पारादीप इकाई च सल्फ्यूरिक एसिड दे त्रीये प्लांट दा बी उद्घाटन कीता। श्री शाह होरें भुवनेश्वर च इक सहकारी विकास सम्मेलन गी संबोधित बी कीता। उ'नें आखेआ जे एह परियोजनां ओडिशा दे विकास च महत्वपूर्ण गेंह न। उ'नें

आखेआ जे सल्फ्यूरिक एसिड संयंत्र, घरेलू उत्पादन गी मजबूत करग ते एहदे'ने रसैने सरबन्धी खेतर च आत्मनिर्भरता हासल करने च मदाद मिलग। श्री शाह होरे आखेआ जे केंद्र सरकार ने वामपंथी उग्रवाद गी खत्म करने दे जतने गी तेज करी दिता ऐ ते देश, इस म्हीने दे अखीरे धोडी नक्सलवाद शा मुक्त होई जाहग। उ'ने ओडिशा च राष्ट्री फोरेंसिक विज्ञान विश्वविद्यालय दे इक परिसर दा नीह पत्थर बी रक्खेआ ते एहदे अस्थायी परिसर दा उद्घाटन बी कीता। श्री शाह होरे आखेआ जे केंद्र ते ओडिशा सरकार अमूल मॉडल आहला लेखा राज्य दे हर ग्रंs च इक मजबूत सहकारी ढांचा स्थापित करने लेई किट्ठे मिलिये कम्म करडन।

<><><><><><>

#### DGCA-Noida

शैही हवाबाजी सरबन्धी महानिदेशालय-डी.जी.सी.ए. ने उत्तर प्रदेश दे गौतम बुद्ध नगर जिले दे जेवर च स्थित नोएडा अंतरराष्ट्री ब्हाई अड्डे लेई यमुना इंटरनेशनल एयरपोर्ट प्राइवेट लिमिटेड गी ब्हाई अड्डा लसैस प्रदान कीता ऐ। ब्हाई अड्डे गी सार्वजनिक इस्तेमाल आहली श्रेणी दे तैहत कम्मकाज लेई लसैस दिता गेआ ऐ। शैही हवाबाजी सरबन्धी मंत्रालय ने दस्सेआ ऐ जे ब्हाई अड्डे दा विकास च' उं चरणे च इक बहु-मॉडल कार्गो हब दे कन्ने कीता जा' रदा ऐ। पैहले चरण च, इक रनवे ते इक टर्मिनल दे कन्ने, ब्हाई अड्डे दी समर्थ हर ब ' रे तकरीबन इक करोड 20 लक्ख यात्रिये गी सांभने दी होग। सबने चरणे दे

सबूरा होने दे बाद नोएडा अंतरराश्ट्रीय ब्हाई अड्डा हर ब' रे 7 करोड यात्रियें गी सांभने च सक्षम होग। नागर विमानन मंत्री के. राममोहन नायडू होंरें उत्तर प्रदेश सरकार गी बधाई दिं'दे होई आखेआ जे एह् राश्ट्री राजधानी खेतर ते पच्छमी उत्तर प्रदेश लेई ब्हाई संपर्क गी मजबूत करने दी दिशा च इक बड्डी गैह् ऐ। उ'नें आखेआ जे आल सतह दा एह् ब्हाई अड्डा, इलाकाई आर्थिक विकास, सैलसफा ते रास-पूजी गी बढ़ावा देग।

<><><><><><>

## Nepal-Election

नेपाल च, प्रधानमंत्री दे औहद्धे दे मेदवार बालेंद्र शाह हुं'दे नेतृत्व आहली राश्ट्री स्वतंत्र पार्टी, हिंसक जेन-ज़ी दे बरोध प्रदर्शनें दे बाद होए दे पैहले आम चुनाव च बड्डी जित्त बक्खी अगड़ी बधा करदी ऐ। चुनावs आयोग दे ताजा आंकड़ें मूजब 165 निर्वाचन खेतरें चा 28एं सीटें दे नतीजे घोशत करी दिते गेदे न। राश्ट्री स्वतंत्र पार्टी ने 20 सीटां जित्ती लैती दिआं न ते 97 सीटें पर ओह् अग्गे चला करदी ऐ। नेपाली कांग्रेस ने 5 सीटां जित्ती लैती दिआं न ते ओह् 9वें वीटें पर अग्गे ऐ। इस्सै चाल्ली यूएमएल गी इक सीट मिली गेदी ऐ ते ओह् 13 सीटें पर अग्गे चला करदी ऐ जिसलै के नेपाली कम्युनिस्ट पार्टी ने 2 सीटां जित्ती लैती दिआं न ते 10 सीटें पर उन्ने बढत बनाई दी ऐ। वोटें दी गिनतरी अजें चला करदी ऐ। संसद दे कुल 275 सदस्यें चा 165 सदस्य प्रतक्ख मतदान दे राहें चुने जंदे न, जिसलै के बाकी दे 110 सदस्यें दी ताल अनुपात आहली प्रणाली दे माध्यम कन्ने कीती जंदी ऐ।

## West Asia Conflict

इजराईल ते अमरीका दिएं सांझी फौजें ते ईरान बशकार जारी संघर्ष दा अज्ज 8मां दिन ऐ। अमरीकी राष्ट्रपति डॉनल्ड ट्रम्प होरें ईरान दे कन्ने किसी बी समझौते थमां नां करदे होई ओहदे बिजन कुसै शर्त दे आत्मसमर्पण दी मंग कीती ऐ। ट्रम्प होरें सोशल मीडिया पोस्ट च आखेआ ऐ जे ईरान दे आत्मसमर्पण करने पर अमरीका ते ओहदे सैहयोगी देश ईरान दे आर्थिक पुनर्निर्माण च मदाद करडन। व्हाइट हाउस दिएं प्रेस सचिव कैरोलिन लीविट होरें पत्रकारें गी दस्सेआ जे अमरीका, ईरान दे ब्हाई खेतर पर नियंत्रण दी दिशा च प्रगति करा' रदा ऐ ते चार थमां 6एं हफ्तें दे अंदर लक्ष्य हासल करने दी मेद ऐ। उ' नें इब्बी दस्सेआ जे अमरीका, ईरान दा नेतृत्व करने आस्तै संभावित मेदवारें पर बचार बी करा करदा ऐ। उत्थे गै, ईरान दे राष्ट्रपति मसूद पेजेशिकियन होरें आखेआ ऐ जे किश देशें अमरीका ते इस्राएल दे कन्ने चला करदे संघर्ष गी खत्म करने लेई पैंची पाने दे जतन शुरु करी दिते न। जारी संघर्ष च हुनै धोड़ी ईरान दे 12 सौ शा मते लोक मारे गेदे न जिसलै के इस्राएल च तकीबन इक दर्जन लोकें ते 6 अमरीकी सैनिकें दे मारे जाने दी खबर ऐ। तोआई फ्रांस दे राष्ट्रपति इमैनुएल मैक्रॉन होरें जंदे शुक्रवारें लेबनान च संयुक्त राष्ट्र दे इक ठिकाने पर होए दे इजरायली हमले दी सख्त निंदेआ कीती। तोआई, स्पेन दे प्रधान मंत्री पेद्रो सांचेज़ हुं' दे आसेआ ईरान दे खलाफ फौजी

अभियानें लेई स्पेनिश ठिकानें दे इसतेमाल दी इजाजत देने थमां नां करने दे बाद अमरीका ते स्पेन बशकार तनोतनी बड़ी बधी गई ऐ।

<><><><><><>

### MoS MEA Visit

विदेश राज्यमंत्री कीर्तिबर्धन सिंह कल थमां 4 दिनें दी जातरा पर ब्रिटेड ते चिली जाडन। सिंह होर ऐतवारें ते सोमवारें लंदन च 26में राष्ट्रमंडल दिवस समारोह च भारती प्रतिनिधिमंडल दी अगुवाई करडन। विदेश मंत्रालय नै दस्सेआ ऐ जे भारत राष्ट्रमंडल च सभनें शा मता योगदान करने आहले देशें च शामिल ऐ ते उनें संगठन गी तकनीकी मदाद ते समर्थ निर्माण च सैहयोग दिता ऐ। राष्ट्रमंडल 56 देशें दा इक स्वैच्छिक संगठन ऐ ते एह राष्ट्रमंडल सदस्यें, बशेशतौर पर टापू आहले ते विकासशील देशें कन्नै भारत दी भागीदारी गी मजबूत करने लेई इक महत्वपूर्ण मंच ऐ। कीर्तिबर्धन सिंह हुंदी राष्ट्रमंडल नेतृत्व ते सदस्य देशें दे विदेशमंत्रियें कन्नै मलाटी करने दी बी मेद ऐ। समोआ मजूदा समें च राष्ट्रमंडल दा अध्यक्ष ऐ।

<><><><><><>

### Badminton

ऑल इंग्लैंड ओपन बैडमिंटन चैंपियनशिप च कल रातीं भारत दे लक्ष्य सेन ने क्वार्टरफाइनल च चीन दे ली शी फेंग गी 21-13, 21-16 कन्नै हराइयै मर्दे दे सिंगल्स दे सेमीफाइनल च अपनी थाह पक्की करी लैती ऐ। आलमी रैंकिंग च

12मीं थाहै पर काबिज लक्ष्य दा सामना अज्ज सेमीफाइनल च कनाडा दे  
विक्टर लाई कन्नै होग। एहदे शा पैहले लक्ष्य ने जंदे वीरवारें राउंड ऑफ 16 च  
हांगकांग दे ऐंग का लॉग एंगस गी हराया हा। लक्ष्य ने जंदे मंगलवारें पैहले  
राउंड च अक्वल नम्बरै दे खड्दारी ते मजूदा चैंपियन शी यू क्यूई गी हराइयै  
अपने अभियान दी शानदार शुरूआत कीती ही। तोआई मिक्स्ड डब्ल्स च धुव  
कपिला ते तनीशा क्रास्टो दी जोडी हांगकांग दे तांग चुन मान ते त्से यिंग सुएट  
थमां हारियै पैहले गै प्रतियोगिता चा बाहर होई गेदी ऐ।

<><><><><><>